

開放文學 – 社會奇情 – 綺樓重夢 敘

由來詞客，雅愛傳奇；不是癡人，偏工說夢。賣不去一肚皮詩云子曰，何妨別顯神通；聽將來滿耳朵俚諺村謠，只和合同鬼譚。何況悠悠碧落，蟻自聚於槐柯；浩浩黃輿，鹿且埋於蕉下。將廿一史掀翻，細數芝麻賬目；直把十三經擱起，尋思橄欖甜頭。顛倒著即色即空之公案，描摩就忽啼忽笑之情形。

且也，證明因果，石自能言；打破橫關，草堪獨怨。去年人面，休煩崔護題詩；再世婚姻，仍遣韋臯作婿。飛枕邊之蝴蝶，創開百代勛猷；攜籃內之櫻桃，幻作一場富貴。胡天胡帝，要須在無何有之鄉；如雲如荼，不過比將毋同之例。賈原是假，甄亦非真。曾參何處殺人，問去不聲冤屈；鄭繁今朝作相，算來好像應該。徹犀角之七層，彎弓妙手；貫明珠之九曲，穿縷精心。悲歡離合，通呼吸於鼻孔之間；將相王侯，看安排於手掌之上。縱使愛眠宰我，會心處不覺伸腰；便令不笑包公，得意時也勞捧腹。嗟乎，一枝斑管，譜成金玉良緣；百幅芸箋，寫出綺羅豔事。三千界蒼茫銀海，原屬寓言；十二重縹緲紅樓，仙客重記。嘉慶乙丑年季夏重編。